

## MÁLSTEFNA ML

Hlutverk framhaldsskóla er að stuðla að virkni nemenda í lýðræðisþjóðfélagi og búa þá undir þátttöku í atvinnulífinu og frekara nám. Það er því stefna Menntaskólans að Laugarvatni að styðja nemendur í því að taka þátt í íslensku samfélagi í rituðu og mæltu máli á sem flestum sviðum. Málstefna Menntaskólans að Laugarvatni þjónar þessum markmiðum.

Talmál og ritmál skólans er íslenska, jafnt í kennslu sem öðru skólastarfi og viðmóti skólans. Þetta er í samræmi við gildandi málstefnu íslenskra stjórnvalda og lög um stöðu íslenskrar tungu og tákn máls nr. 61/2011, og lög um framhaldsskóla nr. 98/2008.

Við Menntaskólann að Laugarvatni er áhersla lögð á alla færniþætti tungumálsins í samræmi við viðmiðunarramma Evrópuráðsins um tungumálanám og norræna málstefnu.

Málnefnd skólans veitir ráðgjöf og aðstoð við að framfylgja málstefnunni.

### 1 STARFSUMHVERFI OG VINNUVIÐMÓT

Íslenska er sjálfgefið tungumál í öllu starfi Menntaskólans að Laugarvatni nema undantekningar krefji.

Leitast er við að starfsumhverfi skólans, viðmót í tölvum, bæði stýrikerfum og helsta notendahugbúnaði sem starfsfólk og nemendur nota innan skólans, sé íslenska eftir því sem kostur er.

### 2 NEMENDUR OG STARFSFÓLK MEÐ ANNAÐ MÓÐURMÁL EN ÍSLENSKU

Stefna skólans er að styðja nemendur og starfsfólk með annað móðurmál en íslensku til virkni og árangurs í skólastarfinu. Jafnframt að búa nemendur af erlendum uppruna undir frekara nám og aðra þátttöku í samfélaginu með því að bjóða þeim íslenskukennslu við hæfi. Skólinn mætir jafnframt þörfum nemenda og getu þeirra hverju sinni í samræmi við 35. gr. framhaldsskólalaga nr. 92/2008.

Móttaka og stuðningur við nemendur með annað tungumál en íslensku skal vera í samræmi við móttökuáætlun þar um.

### 3 MÁLNOTKUN

Mál það sem notað er í skólanum eða á vegum hans skal vera vandað, einfalt og skýrt. Vandað mál er markvisst og í samræmi við málvenju, í réttu málsniði, vandlega frágengið og ritað í samræmi við gildandi reglur um réttritun.

Starfsmenn og nemendur ML skulu hafa greiðan aðgang að öllum helstu handbókum um íslenskt mál, svo sem íslenskri orðabók, stafsetningarorðabók og samheitaorðabók. Jafnframt skulu nemendur og starfsfólk ML eiga þess kost að nýta máltækniþúnað fyrir íslensku, svo sem



## STEFNUSKJAL

FLOKKUR: STJÓRNUN OG SKIPULAG

ÁBYRGÐARAÐILI: SKÓLAMEISTARI

ÚTGEFIÐ: 23.4.2021

leiðréttingarforrit, talgervla, talgreina og þýðingarforrit, ekki síst máltæknibúnað sem nýtist fötluðu fólki í námi og daglegu lífi.

Skólastjórnendur sjá til þess að kennarar og aðrir starfsmenn sem ekki skilja íslensku geti fylgst með og tekið þátt í fundarstörfum og öðru skólastarfi eftir því sem nauðsyn krefur. Stjórn nemendafélagsins ber sambærilegar skyldur gagnvart nemendum í félagsstarfi.

### 4 KENNSLA OG NÁMSGÖGN

Íslenska er sjálfgefið kennslumál í Menntaskólanum að Laugarvatni nema í tungumálakennslu. Námsmat skal fara fram á sama tungumáli og kennsla.

Kennarar skulu leitast við að vísa á bækur og annað kennsluefni sem er á íslensku. Ef hentugt námsefni er ekki til á íslensku sér kennari nemendum fyrir íðorðasafni.

Nemendur með annað móðurmál en íslensku fá námsgögn og kennslu á íslensku eins og aðrir nemendur skólans en þeim er heimilt að skila úrlausnum verkefna og prófa á ensku ef þörf krefur.

### 5 UPPLÝSINGAR OG ÚTGEFIÐ EFNI

Skrifleg gögn í stjórnsýslu Menntaskólans að Laugarvatni, svo og opinberar upplýsingar sem skólinn sendir frá sér, til dæmis fundarboð, fundargerðir, boð á fyrirlestra, tilkynningar um viðburði, fréttir, skýrslur og fleira, skulu vera á íslensku. Enskur texti fylgir með ef þörf krefur.

### 6 ÁBYRGÐ OG FRAMKVÆMD

Nánari útfærsla og framkvæmd málstefnu Menntaskólans að Laugarvatni er á höndum skólameistara og málnefndar skólans. Málnefnd fylgist með hvernig stefnunni er framfylgt, og stendur fyrir kynningu stefnunnar og endurskoðun eftir þörfum.

Skólameistari ber ábyrgð á málstefnunni og getur heimilað tímabundin frávik frá einstökum ákvæðum hennar ef nauðsyn krefur.